


南漢書 六之八




漢書門			
二	三	三	二
八	五	四	
冊	架	函	號類

內閣文庫			
二九	二三	漢書	
函	三		
二	二	四	
三	冊	號	類

內閣文庫	
番號	漢 2334
冊數	12 (4)
函號	290 173






南漢書卷六

本紀第六

後主紀二

順德梁廷栢章再撰



大寶十四年春正月宋將潘美等陷英州復陷
雄州都統潘崇徹以眾降於宋宋師進次瀧頭
帝遣使請和求緩師美等不許恐我兵設伏挾
使者速度諸險甲子宋師至柵口乙丑至馬廐

屯雙女山下直瞰我軍柵遊騎數出挑戰植廷
曉將發卒迎擊招討使郭崇岳止之堅壁自守
帝取巨舶十餘艘載其妃嬪金寶將浮海未發
宦官樂範與衛兵千餘盜舶走帝益懼遣王珪
詣宋軍通好又遣左僕射蕭灌中書舍人卓惟
休奉表詣宋軍乞降宋殿直冉彥袞以灌等赴
汴帝命崇岳戒嚴二月丁卯朔命判六軍十二
衛正王保興率百官出迎爲崇岳所邊己巳遣

保興率國內兵併力拒戰庚午植廷曉領前鋒
據水陣崇岳殿後宋師濟廷曉戰敗死之崇岳
奔還柵美募丁夫間道造柵縱火天風轉北我
軍復大敗崇岳爲亂兵所殺保興逃歸龔澄樞
李托與內侍中薛崇譽等焚府庫宮殿帝欲赴
火死不決辛未宋師至白田帝素衣白馬出城
北七里降漢亡美等入城俘宗室官屬九十七
人與後主同縶於龍德宮斬宦官五百餘人州

六十縣二百十四戶十七萬二百六十三盡籍
於宋四月美遣使部送後主及宗黨官屬歸宋
京行抵公安邸吏龐師進迎謁後主問學士黃
德昭師進何人何爲在此德昭曰高祖居藩時
歲貢大朝輜重皆歷荊州令師進置邸於此造
車給餽運耳後主泣嘆曰我在位十四年未聞
此言今始知祖宗山河乃大朝境土也因泣下
至宋京師舍後主於玉津園甲午宋太祖命參

知政事呂餘慶劾問約降復戰及焚府庫之罪
後主歸罪龔澄樞李托薛崇譽太祖復遣使責
問澄樞等皆不能對五月乙未朔宋有司率武
士以帛繫後主及官屬先獻太廟及太社太祖
御明德門樓通事舍人引後主就東西街南北
向俘位太祖遣攝刑部尙書盧多遜宣詔責後
主後主曰臣年十六僭偽號澄樞等皆先臣舊
人每事臣不得自由臣是臣下澄樞等是國主

遂伏地待罪太祖命攝大理卿高繼申斬澄樞
托崇譽三人於千秋門外釋後主賜宴於大明
殿賜襲衣冠帶器幣鞍馬授金紫光祿大夫檢
校太保右千牛衛大將軍員外置同正員封恩
赦侯班在上將軍下以正王保興爲右監門率
府率右僕射蕭濯爲太子中允中書舍人卓惟
休爲太僕寺丞餘並署諸州上佐縣令主簿賞
賜有差六月乙酉宋太祖賜後主月奉外錢五

萬米五千斛開寶五年五月庚申賜錢百五十
萬八年十二月己未江南平遷後主左監門衛
上將軍進封彭城郡公太平興國初進衛國公
二年二月壬子賜宴崇德殿三年正月辛丑賜
宴崇德殿三月己酉賜宴長春殿六年三月薨
年三十九太宗廢朝三日贈太師追封南越王
後主性庸懦早歲嗣位政務未諳疑羣臣皆有
家室惟宦者專誠可信遂委國事於龔澄樞陳

延壽及才人盧瓊仙臺省官僅備員不復預機密每詳覽可否皆瓊仙指之延壽又引女巫樊胡子入宮自言玉皇附其身呼後主爲太子皇帝詭言瓊仙澄樞延壽皆我遣輔太子有過不得治於宮中施帷幄列珍玩設玉皇座樊胡子冠遠遊冠紫衣紫霞裙坐爲玉皇言宣禍福事皆決焉後主再拜聽命梁山師馬媪何擬之徒出入宮掖宮人多具冠帶領外事先是高祖雖

寵任中官然數裁三百餘位不過掖庭諸局令丞中宗稍增至千餘人已有內常侍諸謁者之稱至後主漸至七千餘有爲內三師三公者諸使名多至二百女官亦有師傅令僕之號以百官爲門外人臣工有小過及進士狀頭或釋道稍負才畧可備問者皆下蠶室令得出入宮闈由是綱紀大壞又踵祖父奢酷立萬政殿一柱之飾費白金三千錠以銀爲殿衣間以雲母無

名之費日千萬興王府中鑿湖五百餘丈曰藥洲聚方士煉藥縱罪人使移太湖靈璧及三江所產巨石凡九浮海歸置洲中以自贖城西濬玉液池以歲之五月五日出宮人競渡其中又崇信釋氏教於府城四面建二十八寺以應列宿嘗夢神人指羅浮山之西去延祥寺西北兩岸疊中一洞可爲宮遣人訪得金沙洞地建天華宮又夢金龍起於宮所改洞曰黃龍時議於

增城江口穿渠達羅浮便巡幸因宋師來不果於海鎮募兵能采珠者二千人號媚川都每以石繩索繫兵足入海五七百尺多溺死久之珠充積內府焚燹之後尙餘美珠四十六甕所居殿宇梁棟簾箔率以珠雜玳瑁爲飾窮極華麗宮中有魚英託鏤椰子立壺四各受三斗作離宮數十挈波斯女不時遊幸常至月餘或旬日每歲荔支熟於昌華苑設紅雲宴又命宮人三

月鬪花內殿後主向晨先啟苑集眾採擇俄敕
肩戶膳訖於內殿角勝負內官抱關置樓置厯
以驗宮人出入曰花禁負者獻耍金耍銀買燕
自稱蕭閒大夫是時國用日蹙重民賦斂定媚
川都課邕民入城者人輸一錢瓊州米斗稅四
五錢制大量每石凡輸一石入斗巡遊所在率
以豪民爲課戶供宴犒之費城內行乾亨鉛錢
城外行乾亨銅錢禁其出入犯者抵死俸祿非

出特恩不給銅錢大海中生金錢蚬味殊珍異
後主取以自奉私採者禁作燒煮剝剔刀山劔
樹之刑或令罪人鬪虎抵象以爲笑樂怨聲載
道末年野蕈生於宮殿狐鳴鬼哭妖怪日作災
異疊見以迄於亡初高祖建國召司天監周傑
筮之過復之豐數當五十五年傑假五百五十
爲對始作宮室得石讖文曰人人有一山山值
牛兔絲吞骨蓋海承劉解者謂人人有一大人

也山山出也值牛者丑歲建國兔絲者中宗卯
歲襲位也吞骨殺諸弟也天水爲趙蓋海宋國
姓承劉受劉氏降也大有改元欽州民握羅浮
山得古劔獻之篆文曰丁與水同宮王將耳口
同尹來居口上山岫護重重解者謂宋太祖以
丁亥誕下三語於文爲聖君出也乾和中童謡
云羊頭二四白天雨至解者謂辛未二月四日
宋師逼城之兆大寶中多火災令民家置防火

大桶識者謂防房桶統同音宋分野屬房言一
統也至是國滅蓋有先兆焉後主雖以愚敗國
然素有口辯能詆諧巧作奇技入宋後嘗以珍
珠結鞍勒爲戲龍狀名珠龍九五鞍獻太祖詔
示尙方諸工官皆駭異給錢百五十萬償其值
謂左右曰銀好工巧遂習以成性倘能移於治
國豈至滅亡哉在國時每置醜斃其臣下一日
宋諸臣從太祖幸講武池後主先至賜以卮酒

疑有毒捧杯泣辭曰臣承祖父基業拒違朝廷
勞王師致討罪固當死陛下不殺臣今見太平
爲大梁布衣足矣願延旦夕之命以全陛下成
恩臣未敢飲此酒太祖笑曰朕推赤心置人腹
安有此事取其酒自飲別酌賜之後主大慚謝
太宗將討太原宴近臣後主預焉奏言朝廷威
靈及遠四方僭竊之主今日盡在座中且夕平
太原劉繼元又至臣率先來朝願得執挺爲諸

降王長太宗大笑賚予甚厚旣薨賜歸葬於韶
州城北六里之王山

南漢書卷六終

南漢書考異卷六

順德梁廷枏章冉撰

後主紀二

十三年九月己亥朔宋潘美等發十州兵攻賀州至十四年二月辛未帝素衣白馬降

按用兵月日諸書互有異同宋史太祖紀九月己亥朔命美等會賀州十月庚辰克賀州十一月壬寅下昭桂二州十二月壬

異

申下連州辛卯下韶州四年正月癸丑取英州雄州二月己丑克廣州紀內日月當各就聞捷日書之修宋史時止據宋國史或實錄不復更正則本紀月日不足據也張傳無出師月日餘則有月無日八月師至白霞九月圍賀州城陷十月陷韶州桂州十一月陷連州十二月陷韶州四年正月陷英州雄州次瀧頭二月過馬逕入廣

州而美傳云十月下韶桂連三州與張傳異東都事畧九月壬子克富州十月克賀州十一月克韶桂二州十二月庚午克連州戊子克韶州正月克英雄二州二月丁亥克廣州稽古錄九月乙卯拔富州十月庚寅拔賀州十一月壬寅拔韶桂二州十二月辛亥拔連州均與宋史異玉海十二月壬寅下桂昭連三州遂下韶州又註云

異

十二月辛亥拔連州二月庚午入廣州亦與宋史異今惟命將月日從宋史紀餘悉從續通鑑然續通鑑與諸書亦互有詳畧宋史紀云九月美等敗南漢萬眾於富州下之美傳亦云九月進克富州事畧亦云壬子潘美克富州而續通鑑無之又鋹傳遣其弟保興率百官奉迎美傳遣王珪詣軍門求通好續通鑑亦無之又玉海引露

布二月四日己巳遣其弟保興併力決戰續通鑑乃繫於是月丁卯朔又賀州之克諸書皆云攻陷而續通鑑獨云開門以納王師此續通鑑與諸書異也又宋師渡馬逕歐史及宋史美傳皆在二月惟續通鑑在正月乙丑先一日甲子至柵口今按露布云於正月二十七日甲子到柵口去廣只一程與續通鑑合露布當時軍中所作

異

其月日斷不差誤則續通鑑視諸書較信矣又歐史遣其弟祥王保興率文武詣美軍降不納宋史張傳保興率百官奉迎爲郭崇岳所遏則歐史與宋史互有同異事畧先遣保興拒戰復遣保興乞降不納十國春秋亦兩事並存而奉迎事則依宋史且兩事先後不同則春秋與事畧各異又宋史張傳二月過馬逕去廣城十里張遣

蕭灌等奉表乞降師遂頓城外據此是去城十里乃乞降也而美傳乃云遣灌等乞降復遣保興拒戰美卽率士卒倍道趨柵頭距廣百二十里張兵十五萬依山谷壑壘以待據此是乞降後尙去城百二十里也則宋史兩傳互異又按張傳引童謠羊頭二四白天雨至語謂應二月四日天水姓擒張之義

按宋史云羊頭二四白天雨至天雨者王師如時雨之義

異

青箱雜記云羊二四日天雨至天
雨猶天水斤國姓兩說未知孰是玉海亦

云庚午以續通鑑是月丁卯朔計之庚午

為四日與宋史合而續通鑑乃云辛未南

漢主降薛史則明云四月五日為王師所

擒是又以為二月五日矣二說亦各異然

劉氏興亡錄云宋開寶四年正月辛未是年

正月無辛未偽少主迎六軍於城北七里

潘美宣赦釋罪其云辛未與通鑑合興亡

錄為胡賓王作當時稱南漢國史出降月

日自所目擊視他書尤信今採續通鑑并

悉考諸書補其闕南漢春秋誤作十月陷

韶州十一月陷連州遍考無云先陷韶州

者按方輿紀要稱由嶺南下可以直走韶

州然由連指韶實奪銀魄此亦連先於韶

之証

州六十

南漢書考

卷六

五

異

歐史職方考序云嶺南北四十七州為南

漢今據續通鑑

斬宦者五百餘人

續通鑑有闈工百餘輩盛服請見美曰是

極人多矣我奉詔伐罪正為此等命悉斬

之今從宋史張傳

行至公安

宋史張傳作至江陵按宋史地理志江陵

公安並隸荆湖北路之江陵府張傳所稱

類渾舉府名今從續通鑑

至京太祖命呂餘慶劾問約降復戰及焚府庫
之罪後主歸罪澄樞復使問澄樞等

宋史李托傳及就擒至許田太宗遣使問

托等昨已約降復率眾戰及縱火焚府庫

為誰之謀是中道迎問托等也續通鑑則

云先問張張委罪澄樞等三人復遣問三

異

人皆俛首不對是先問銀再問澄樞似於情事較信且皆至京舍玉津園後事與宋史銀傳合今從之銀傳無繼問澄樞等事五月乙未朔繫後主獻太廟

玉海作五月一日己未宋史作乙未按是年正月戊戌朔至五月朔則乙未矣今從宋史

斬澄樞三人於千秋門外

十國春秋注云一作午門外今從宋史六年三月薨年三十九

宋史云太平興國五年薨而不詳何月續通鑑綱目則繫於是年三月今按銀以周顯德五年襲位年十六卒年三十九首尾凡二十四年卒年當為太平興國六年綱目乃誤先一年耳今更正其年而姑仍其月

異

自言玉皇附其身

宋史樊胡入宮言玉皇命張爲太子皇帝坐宣禍福張再拜聽命按五國故事樊胡子自言玉皇大帝附其身爲大帝言曰瓊仙等皆我命之以爲爾輔張再拜而聽蓋張以爲真玉皇降故拜非拜巫也今從故事

有爲內三師三公者

十國春秋百官表有內太師內大傅內太保按南漢內太師之職最多無官內傅保者邵氏見聞後錄云漢唐宦者可謂盛矣然官不至師保也劉張有宦者七千餘人始有爲師保者藝祖旣縛張以來鑒其禍內侍不許過供奉官又張之宮輒名龍德云云據此則當日自有保傅之職特無考耳又南海志作宦者近二萬人今從宋史

異

建天華宮欲鑿渠通羅浮不果

增城志銀建天華宮鑿涌於增城惠州博羅兩志並云建天華宮於羅浮山至宋朝革命僭叛以次誅服劉氏懼欲潛遁羅浮為狡兔之穴命於增江口鑿濠通山倉卒為航舟計知劉氏為宮室於山間無事為臨賞之樂警急為逋逃之所志語本東坡文集按歐史宋史續通鑑並云以船十餘欲入海

重載珍寶為樂範所盜則當日已備舟海濱矣如云欲避居羅浮今渠尙未鑿安有大船為範竊走事惠州博羅增城志並誤又歐必元羅浮行記云晟作天華宮今從十國春秋採珠者二千人

澠水燕談錄兵置八千人專以採珠為事今從續通鑑

異

城內行鉛錢

十國紀年漢史劉龔以國用不足鑄鉛錢
十當銅錢一乾和後多聚銅錢城內用鉛
城外用銅十國春秋繫於大寶五年今統
附紀後

野蕈生宮殿狐鳴鬼哭

歐史在大寶四年云芝菌生於宮中無狐
鳴鬼哭事五國故事作銀末年事云野蕈

生宮殿無歐史所載野獸觸寢門苑中羊
吐珠事按芝菌野蕈同物異名或各為一
事別無考證今姑分隸而刪其複

丁與水同宮

十國春秋己與水同宮陳璉惠州羅浮山
志作丁黃通志云太祖丁亥年生長太宗
十二歲平嶺南乃太祖之世故知者以此
論之又引宋人題陳搏象有屬豬人已著

異

龍袍語為丁亥聖君出之證今從之又按掘劍在欽州之羅浮見欽州志惠州志編入郡事誤陳璉則誤以為惠州羅浮而收之也

以珍珠結鞍勒為戲龍之狀

五國故事作珍珠龍鳳鞍帕今從宋史

詔示尚方諸工官

宋史作示諸宮

謂左右曰至豈至滅亡哉

五國故事謂羣臣曰聞銀所貢悉皆手製其所善止此不亡何待耶今從宋史

歸葬韶州城北六里之王山

十國春秋歸葬於韶州之越王山寰宇記王山俗名越王山二千石初到皆致虔祠廣東輿圖越王山俗呼白虎山南越王劉銀之墓在焉是越王山本名王山因銀封

異

南越王歸葬後故名之越王山耳又輿地紀勝銀墓在曲江縣獅子岡黃通志云獅子岡卽今白虎寺越王山也但無影跡可考又按增輯嶺海名勝記引鄭學醇花田詩注云南漢主劉鋹歸宋爲恩赦侯放歸後學煉丹自古降王得反國惟鋹一人今考學醇勾漏集註止云僞劉歸宋爲恩赦侯學燒丹不云放歸也名勝記誤

異

南漢書考異卷六終

南漢書卷七

順德梁廷枏章冉撰

列傳第一

廷枏曰古一姓之興固其祖若宗數世所積累
抑內助之賢母範之正有以成之南漢據偏隅
渺乎莫可比數然考所自起實藉外家援引之
力韋后之歸代祖也排羣議僅而後濟天所以
啟劉氏者不可謂不厚奈何妬遇妾媵戕段氏

南漢書

卷七

南漢書

卷七

而奪所生於襁褓中蓋閨房之內不能正厥始
焉馬后正位十又七年琴絃中絕於是趙太妃
謝尚儀輩爭妍獻媚寵冠一時乃殤帝甫立而
賊臣弒之循王請討賊而怨家殺之覆巢取鷄
哀鳴無及曾不若蕪才人之淡謝榮華猶足逍
遙自適也吁可悲已中宗嬪御之列雜之以周
親雖事出蠻夷難論倫紀而彥真奸通之獄卒
發於身後而莫能掩蔽冥冥中有主之者矣瓊

仙瓊芝自中宗時久干外政至後主而大恣狐
威黨朋閹豎因之李氏二女魚貫而前媚豬妖
邪日陪遊輦以禁廷爲宣淫之地以宮婢爲倡
妓之流汚玷如斯不亡何待卽有艷述於文人
學士如素馨如離非女子者究奚掩宮闈穢跡
於萬一哉詩有之言之醜也作后妃傳

后妃列傳

武皇后韋氏京兆萬年人唐左僕射宙從女也

先世多顯宦有孝寬者仕隋至尚書令琨仕唐
爲太子詹事贈泰州都督諡貞祖丹舉五經高
第積官晉慈隰州觀察使封武陽郡公咸通三
年分嶺南爲西東道以宙爲東道節度使挈家
至南海后亦隨侍時南詔陷交趾嶺表震動宙
撫兵積備選練部曲代祖適隸麾下充賀水鎮
將職級甚卑而氣宇特超異宙見招與語奇之
將使后歸焉宙夫人以貴賤懸殊慮招物議頗

猶豫然宙意殊決夫人恐不可諫乃諷諸幕僚
從容勸止其事宙弟岫因曰彼狀貌迥出庸流
吾就結婚媾他日子孫或可依托由是卒以后
妻代祖生烈宗未幾其妾段氏產高祖於外舍
后素妬不能逮下聞段亦產子怒不可制拔劍
出中門使取高祖至將手刃之及見卽驚悸所
持劍不覺墜地良久曰此非常兒我家之寶也
遂取高祖自養爲子先封越國夫人高祖稱制

追尊曰武皇后

段氏代祖側室高祖生母也唐僖宗文德元年
生高祖時武皇后韋氏已產烈宗聞之不能容
欲殺高祖使索之段氏懼莫敢匿后既養高祖
爲己子慮他日有違言後三日遂殺段氏滅其
跡段氏被害代祖爲營葬地土中得白石版有
篆文曰隱台巖因名烈宗曰隱高祖曰巖高祖
長嗣烈宗位無敢言段氏被殺事者故稱尊後

不及追上稱號焉

高祖皇后馬氏楚武穆王殷女也乾化初高祖
代烈宗爲節度有吞併隣封志數攻楚梁帝遣
使來叶和兵始息三年高祖年二十八將擇偶
以楚新睦欲結爲婚姻遂使如楚求后武穆王
許之因聘焉貞明改元八月具禮往迎武穆王
使弟永順節度使存送後來嶺南禮意優厚后
既歸高祖越二年高祖始稱越帝封后越國夫

人乾亨三年春冊爲皇后大有七年冬殂祔葬於康陵

太妃趙氏殤帝生母也有殊色事高祖寵擅專房大有中封昭儀光天元年殤帝嗣位尊爲皇太妃

尙儀謝氏名宜清姿容絕艷選入事高祖愛之進職尙儀馬后殂命偕尙衣高氏至吳越求后妹吳越不遣遂還

才人蘓氏咸寧人有色工詩律好爲歌詞後宮擬之曹大家大有初封才人時高祖多內嬖爭妍獻媚惟恐不得當蘓氏亦被寵幸然性雅淡絕無希寵意官中日焚香靜坐或寫字數紙而已

麗妃李氏中宗妃也性狡媚最見寵幸中宗方委任宦官宦官又潛結宮掖以爲援內侍監許彥真知如寵固頃心向之因得表裏用事大寶

中彥真與龔澄樞爭權會有人告妃通彥真澄樞將按其事兩班將軍王仁遇素附澄樞亦以彥真謀叛入告彥真誅妃事乃寢

貴妃李氏後主妃內官李託所養長女也後主廣選後宮嬪御託養二女皆有色大寶五年並進之既得幸大被寵憐即日冊爲貴妃

美人李氏託所養次女也與其養姊同時進御亦得寵後主既冊其姊爲貴妃李氏亦得封美

人宮中以漢之飛燕合德擬之

盧瓊仙咸寧人中宗時宮人體輕盈肌膚雪白乾和中與黃瓊芝等十餘人並爲女侍中朝服冠帶出參朝政後主嗣位進拜才人女巫樊胡子爲玉皇言謂後主瓊仙等皆我遣輔爾不得治其過後主信之無大小悉決焉每詳覽章奏以瓊仙言爲可否不復有所增減瓊仙遂結內官龔澄樞陳延壽輩專握朝柄廷臣但備員聽

中旨卒以此亡國

波斯女不知其姓後主宮人貌黑脂而光艷性
絕慧巧得人意每見幸能曲盡淫態後主甚嬖
之賜名媚豬嘗挈之遊幸離宮數十所環歷殆
遍所至必一月或旬日乃還宮後主本荒縱得
女益淫褻無度多求方士媚藥以助之又好觀
人交選惡少年數輩入宮使與宮婢就後苑褫
衣露偶扶女往來循觀爲笑樂號大體雙時與

女戲狎宮妾滿前不令避鳥獸習見之亦能效
其狀國亡後不知所終

素馨後主司花宮女以色進御封美人性喜簪
那悉茗花因名之素馨死葬興王府城西北郊
後主痛之使人多植那悉茗花於塚上號其地
曰素馨田墳曰素馨斜

離非女子後主時宮人性慧通筆札能作大小
篆爲後主所眷始終不少弛內宮文房寶玩多

歸典掌得一硯石形甚小而佳嘗製銘鐫刻自
寶藏之

李蟾妃不知何時入宮有殊寵時興王府城
外蘓氏園景絕幽勝妃嘗隨上微行至此憇蕉
林中酒酣大書蕉葉日扇子僊好事者構扇子
亭其上以紀勝云

南漢書卷七終

南漢書考異卷七

順德梁廷枏章冉撰

武皇后傳

有孝寬者仕隋至尙書令

新唐書韋丹傳周大司空孝寬六世孫宰
相世系表文惠公旭次子叔裕字孝寬隋
尙書令官爵互異今從世系表

咸通三年以宙爲東道節度使

南漢書考卷七

異

舊唐書懿宗紀咸通三年分嶺南爲東西道以邕管經畧使鄭愚爲廣州刺史充嶺南東道節度觀察處置等使唐書語林韋宙大中初除廣州節度據此似宙在大中間已節度廣州至咸通三年分道時任東道者爲鄭愚非宙也又通鑑分嶺南爲兩道以嶺南節度使韋宙爲東道節度使據此則宙于咸通三年已改東道矣兩說互

異今按新唐書宣懿兩宗紀無命宙爲節度明文而宙傳遷嶺南節度使在南詔陷交趾時南蠻傳南詔攻交州進畧安南在咸通三年其年宙奏南詔必襲邕管且是年西道節度蔡京爲亂軍所逐以鄭愚代京爲節度則宙官東道節度在咸通三年與通鑑合舊書乃誤以鄭愚所領之西道爲東道耳今從新書及通鑑

異

諷幕僚令勸止其事宙弟岫因曰此人狀貌迥出庸流吾子孫或可依託

薛史宙以猶女妻之妻以非其類堅止之宙曰此人非常流他日我子孫或可依之北夢瑣言乃以從猶女妻之其內以非我族類慮招物議諷諸幕僚請諫止之丞相曰此人非常流也他日吾子孫或可依之新唐書韋岫傳宙在嶺南以從女妻小校

劉謙或諫止之岫曰吾子孫或當依之薛史無諷幕僚諫止事新書作岫語互異按岫傳云盧攜舉進士陋甚岫獨謂攜必大用攜果執政據此則岫素有人倫之鑒妻謙一事或起意在宙至是岫復以一言贊成之也今從新書又舊唐書謙傳以兄女妻之衆謂不可當指幕僚諫止事

段氏傳

南漢書考

卷七

異

段氏高祖生母

北夢瑣言謙以軍功拜封州刺史韋夫人
 生子曰隱曰巖隱為廣帥巖嗣之薛史謙
 之長子曰隱即韋氏所生歐史殺段氏養
 為己子五國故事巖之正母韋氏頗妬按
 諸書無云巖為韋氏所生者瑣言誤
 後三日遂殺段氏

五國故事止云取為己子無殺段氏事今

據歐史

有篆文曰隱台巖因名烈宗曰隱高祖曰巖

新唐書韋岫傳謙後以功為封州刺史生
 二子即隱龔按劉氏興亡錄皇考葬段氏
 得石版有篆文曰隱台巖因名其三子新
 書云二子誤

高皇后馬氏傳

附葬於康陵

南漢書考

卷七

四

異

馬氏葬地諸書無考曝書亭集南漢主劉
龔墓在番禺縣治東二十里北亭明崇正
丙子秋九月穴中有鷄鳴土人發其墓隧
道崇五尺深三尺有金像十二一冕而坐
一笄而坐殆馬后也又精華錄訓纂墓在
縣東二十里崇正九年秋北亭洲間有雷
出奮而成穴一田父見之投以石空空有
聲乃內一雄鷄其中夜盡聞鷄鳴率子弟

以入堂宇豁然珠簾半垂左右金案玉几
備列有金人十二中二金像冕而坐若王
與后者重各五六十斤按馬氏像與巖並
置墓中疑馬氏祔葬康陵矣且馬氏死在
巖稱帝後卽別置陵寢其封樹華表自有
體制後人固易尋識然見於紀載者康陵
而外晟墓在番禺縣東北四十里之昭陵
山銀墓在曲江縣北獅子岡劉王女墓在

異

陽江縣東劉王墓在開平縣東白桂坪謙
與隱墓並在封川縣北十里劉王岡俱見

大清一統志 宮人葬番禺縣西十里三角市而

已馬氏墓固未之聞又南海百詠序云陵

山劉氏墓在郡東北二十里漫山皆荔子

樹龜跌石獸具存昔有發其墓者其中以

鐵鑄之予嘗至此摩挲斷碑不見始末但

見其詞皆葬婦人墓考之偽史疑懿陵也

他尚有數處如南海宣風鄉及番禺黃城

新會上臺玉環了髻山等處皆有之云云

與十國春秋高祖陵中以鐵錮之在城東

二十里皆合當是康陵其云葬婦人墓或

即敘馬氏祔葬事碑殘不得其始末耳今

直書祔葬康陵而誌疑於此又按南漢五

主惟玠陵名無考百咏序稱考之偽史疑

是懿陵不知何指且所據何書也

異

尙儀謝氏傳

進職尙儀

九國志洪杲傳母南儀謝氏今從吳越備

史

麗妃李氏傳

十國春秋作麗姬今從續通鑑

盧瓊仙傳

十國春秋附后妃列傳末按瓊仙張時已

拜才人應次李氏二女傳後

素馨傳

死葬興王府城西

大清一統志五代南漢劉王女墓明統志在陽

江縣東王女名素馨葬此塚上生那悉茗

花因名素馨南海百咏序花田在城西十

里三角市平田彌望皆種素馨花南征錄

云劉氏美人葬於此嶺海名勝記南漢葬

南漢書考

卷七

七

異

宮人於此有美人喜簪素馨遂種之塚上
名曰素馨斜按一統志所載在今肇慶府
陽江縣事同地異且一云王女墓一云宮
人墓人固不同也

李蟾妃傳

南漢春秋事後主得殊寵按十國春秋不
載何時人阮通志古蹟畧亦止云事漢主
不云何主也今附后妃傳後蟾妃南漢春

秋作姬

異

南漢書考異卷七終

南漢書卷八

順德梁廷枏章冉撰

列傳第二

廷枏曰建國若樹木然枝弱者幹必壞若觀水然流塞者源必壅自然之理也南漢僅僅數十州之地以語礪山帶河勢固有所不足然高祖封王諸子必因其地以為爵豈不知名實相悖哉蓋隱示以維城之義使後之人知屏藩之重

南漢書

卷八

之不可棄耳又安能料夫傳不再世竟歸猜忌
殘忍者之手而罷之囚之酖之殺之并其子而
盡殲之求一芽蘖之留於後而不可得耶後主
聽言不聰踵乃父覆轍桂王首及於禍厥後宋
師南征將乏謀畧軍無鬪志急難之宗室正王
而外更無他人向非戎馬生郊能保厥元至於
是歟假令當日剗削未盡宗盟尙典宿衛握兵
柄破竹之勢未嘗若此其易易也作諸王公主傳

諸王公主列傳

高祖諸子

雍王耀樞高祖長子也未詳所生母大有五年
封未幾薨

康王龜圖高祖第二子殤帝兄也大有五年與
耀樞等同日並封亦早薨

越王洪昌高祖第五子大有五年封幼卽孝謹
有知識深爲高祖所喜高祖疾大漸時雍王康

王並早逝殤帝於諸王中最長當立高祖召右
僕射王翽與語呼殤帝及中宗小名曰壽雋雖
長然皆不足任吾事惟洪昌類我意欲立之奈
何吾子孫不肖後世如鼠人牛角勢當漸小爾
因歔泣下翽勸帝出殤帝鎮邕州中宗鎮容
州立洪昌爲太子議已定會崇文使蕭益入問
疾高祖以其事訪之益力言其不可乃止光天
初正州賊張遇賢自稱中天八國王擁衆數萬

攻下郡邑據循州殤帝命洪昌爲都統與弟循
王洪杲同將兵討賊次錢帛館洪杲先犯賊鋒
洪昌繼之賊大至洪杲戰敗裨將萬景忻等以
大楯翼洪昌及洪杲潰圍出殤帝旣得位驕淫
不親政事逆意者輒死洪昌屢諫不聽已而果
爲陳道庠等所弑洪昌聞變帥諸王哭臨迎中
宗卽位應乾改元論迎立功加太尉兼中書令
諸道兵馬都元帥知政事申宗因弑立不順慮

諸王爲亂謀盡誅之洪昌素賢頗得衆心尤所
切忌乾和二年三月使如海曲祭烈宗陵先伏
盜於昌華宮以待洪昌至爲盜殺

齊王洪弼高祖第六子大有五年封應乾初出
爲建武節度使聞弟循王洪杲爲劉思潮等所
譖被殺自以身居大鎮懼禍及表請受代入覲
許之既至命幽於私第乾和五年九月出殺之
韶王洪雅高祖第七子大有五年封中宗初立

以劉思潮等譖殺循王洪杲頗疑洪雅有異圖
是年冬卽命洪雅致仕乾和三年八月殺之

鎮王洪澤高祖第八子大有五年封出鎮邕州
有善政聲績懋著中宗聞而惡之會乾和二年
有鳳凰見於邕管中宗疑爲洪澤瑞恐惑人心
益怒使人賜以酒置毒其中飲之遂暴薨

萬王洪操字貞度高祖第九子鎮王洪澤母弟
也而未詳所生母大有五年封幼知書比長識

量過人十年交州牙將皎公羨殺安南節鎮楊
廷藝自據交州廷藝故將吳權舉兵攻之公羨
以賂來求救高祖欲乘其亂取之遣大將梁克
貞領兵南下自護其軍爲應以洪操爲靜海節
度使徙封交王使統衆自白藤江趨交州會權
已破殺公羨引兵親來海口逆戰先於南口多
植大杙悉銳其首目以鐵潮水方漲權遣輕舟
乘潮挑戰舟陽敗遁洪操乘勝追逐須臾潮落

我舟爲鐵楸所絙盡裂士卒皆沒水死傷過半
洪操戰敗被擒爲權所殺高祖哭之大慟收餘
卒還

循王洪杲字日宣高祖第十子母謝氏有寵拜
尙儀以乾和七年生大有中高祖盡封諸子洪
杲時十歲卽受封爵稍長好步鬪復便弓馬以
膽勇稱諸王皆習儒術或勸之讀書洪杲曰我
家世功名皆起馬上奈何使我獨老一經乎高

祖由是教以兵書畧通大義光天初張遇賢作
亂東方州縣多爲所陷洪杲自請統軍討賊殤
帝以其年幼不許洪杲曰兵法尙變不尙齒請
之益固乃令越王洪昌爲都統以洪杲爲副統
兵至錢帛館軍士方食賊猝至洪杲率親信數
百人介甲躍馬徑入賊中殺數百人被傷者無
算賊少却洪昌領所部繼至與賊大戰自辰及
午賊益盛洪杲軍被圍數重屢突不得出矢下

如雨兵士大半中射死洪杲矢盡挺劍立戰血
流滿袖時陳道庠爲元帥府步軍都指揮使隨
行軍中與萬景忻等奮力救出得免賊旋解去
以戰功授桂州觀察使洪昌旣迎立中宗引洪
杲同心翊戴加副元帥參預政事先是中宗使
劉思潮等拉弑殤帝人情詢詢謗議騰沸洪杲
屢請討賊陰勸暴思潮等罪殺之以息外議中
宗不聽語竟外洩遂爲思潮等側目共譖洪杲

蓄異志將謀亂中宗反遣思潮偵之一日洪杲
在私第偕所親飲酒思潮與譚令禪領兵排闥
突入斬其首以洪杲反狀還報中宗信之
恩王洪暉高祖第十一子大有五年封乾和五
年九月被殺

高王洪邈高祖第十二子大有五年封乾和中
詔除建武節度使出鎮邕州時諸王方以無辜
相繼被戮洪邈知中宗必不釋於已恐居外易

得罪自陳願畱典宿衛不許洪邈素柔懦至鎮
委政僚屬每飲酒必至酣醉醒則禱神禳災禍
而已十二年有人上書誣洪邈在鎮謀作亂中
宗遣甘泉宮使林延遇就邕州賜醢殺之
同王洪簡高祖第十三子大有五年封後與齊
王洪弼等同日見殺
益王洪建高祖第十四子大有五年封中宗嗣
位諸王皆就戮洪建亦爲所殺

辨王洪濟高祖第十五子大有五年封乾和五
年被殺

貴王洪道高祖第十六子大有五年封乾和五
年中宗出韶王洪弼於私第殺之遂及洪道
宣王洪照高祖第十七子大有五年封乾和五
年中宗既殺韶王洪弼洪照與兄恩王洪暉等
七人同日見殺

通王洪政高祖第十八子差長於洪益大有五
年與諸兄同時受封高祖支子十七人中惟雍
王耀樞康王龜圖早死萬王洪操戰沒於交州
之役餘皆次第誅戮獨洪政僅存出爲正州節
度使至乾和十三年夏卒亦被殺

定王洪益高祖第十九子大有五年封乾和五
年與兄齊王洪弼等八人同日被殺洪益於諸
王中年最幼至是遭慘戮國人冤之

中宗諸子

桂王璇與中宗第二子也乾和十一年封後主
卽位淫荒無度宦官陳延壽欲恣行威福慮爲
諸王所制密言於帝曰先帝所以得傳陛下者
由盡殺諸弟也因勸稍誅諸王後主信之遂殺
璇興時大寶三年也
荆王慶興中宗第三子乾和十一年與兄桂王
璇與弟荆王保興梅王崇興同時並受封爵不
知其終

正王保興中宗第四子乾和十一年封後主在
東宮於諸弟中惟保興頗相友愛及嗣位軍國
事多咨委之大寶十四年宋潘美等來伐次師
馬逕後主遣左僕射蕭灌等詣美軍乞降美以
灌等赴汴後主益懼促保興率百官迎美等時
招討使郭崇岳屯柵口保興爲所遏不得出美
等進攻後主復遣保興率衆併力迎戰植廷曉
繼之大敗保興奔還美等入城俘宗室官屬保

興逃匿民家搜得之與後主同至宋京太祖赦後主罪以保興爲右監門率府率

梅王崇興中宗第五子乾和十一年封

後主諸子

守節後主長子不詳所生母大寶十四年國亡

隨後主入宋累官崇儀副使

守正後主第二子入宋官至崇儀副使既卒宋

太祖聞其家貧詔月給以萬錢子克昌官三班

奉職國昌官三班借職

守素後主第三子宋咸平中官侍禁家貧甚宋

真宗聞之詔賜白金百兩語宰臣曰諸僞主子

孫率多窘迫益僭侈之後不知稼穡之艱難所


致也轉西頭供奉尋改東頭供奉未幾遷內殿

崇班天禧中擢爲閤門祇候卒

守通後主第四子仕宋爲供奉官

增城公主烈宗女也乾亨九年長和驃信鄭昱

遣其布燮鄭昭淳來求婚以朱鬃白馬為聘高祖宴之使諸臣與賦詩皆不及遂以公主歸夏逾年夏服丹藥毒發死公主竟終於長和清遠公主高祖女有殊色乾亨元年閩太祖遣使來為其子牙內都指揮使延鈞求婚高祖以公主歸之延鈞既嗣位以太祖才人陳金鳳為媵妃陳氏性窈窕善歌舞嬖之專房由是公主寵日衰永和元年卒被廢而立陳氏為后



平陽公主未詳其所生好遊覽名勝韶州中興寺有僧達摩所遺衣鉢代相傳授閱年既久寺僧寶藏不輕示人公主至索觀摩掌不忍釋忽手指所觸鉢竟闕陷公主深為嘆惜因賜寺僧莊田三千畝使歲收其稅之人酬之

素馨劉氏不詳所生體質絕艷死葬恩州陽江縣東未幾塚上忽生那悉茗花因以女名名之

西樵野史

